

Ministro A.G.Croes a entrega premio Motito/Rufo Wever na Sr.Eddy Bennet

ORANJESTAD(AAN)- Fundacion Promocion Cultura Arubano, presidi pa sr. Joy Kock pa di 7 año consecutivo ta duna reconocimiento nacional na musiconan local, kendenan durante año a destaca sea den canto, areglo, composicion etc. cu e meta primordial pa promove e cultura musical.

Ayera mainta Minister di bienestar General, sr. mr. A.G. (Mito) Croes a haci entrega oficial di e promer "Life's achievement award" na e gran musico Eddie Bennett, kende lamentablemente ta interna den Dr. Horacio Oduber Hospital.

E momento emocional aki a ser presencia pa srs. Leo Tromp, Director di Instituto di Cultura, Edwin Abath, Joy Kock, presidente di Fundacion Promocion Cultura Arubano y Minister A.G. Croes.

Minister Croes na momento di entrega e premio a expresa e palabranan di reconocimiento na e gran musico, areglista pa su gran logronan durante tur e añanan di su bida ariba tereno musical dedicando atencion special na e hobennan.

Sr. Joy Kock a splica cu e intencion desde principio tabata pa entrega e plaquette personalmente na sr. Eddie Benneth. Algun miembronan a mira eventualmente necesario pa permiti un persona ricibi

simbolicamente e premiacion den nomber di Eddie Benneth durante e show.

Teniendo cuenta cu Eddie Benneth a dedica hopi atencion na hubentud den su carera musical a solicita sr. Edwin

Abath, hoben cantante Arubano pa ricibi simbolicamente e premiacion. Sinembargo no a descarta e intencion primordial di haci e entrega personal y oficialmente den Dr. Horacio Oduber Hospital,

na sr. Eddie Benneth.

Cu palabranan hopi emocional sr. Eddie Benneth a ricibi su premio y a expresa na sr. Joy Kock, cu parti di e premio aki ta dedica na su persona. Esaki pa motibo di e perseverancia di e musiconan y e tolerancia di sr. Joy Kock pa cu e desaroyo di "OTI Festival" en especial e representacion di Aruba den exterior.

Ademas el a gradici sr. Joy Kock pa e momento cu e por a presencia cu OTI festival den extranheria. Sr. Benneth a mostra cu muy pronto lo e percura pa su labor di "research musical Arubano" ser imprimi y pa asombro di tur presente el a finaliza cu e sorpresa di sigui su amor musical den hospital trahando ariba un tumba pa carnaval 1989.

Indudablemente e premio di "Life's achievement award" di Mo Tito y Rufo Wever di e Fundacion Promocion Cultura Arubano ta na su lugar merecidamente a otorga e promer premiacion na un gran talento Arubano, sr. Eddie Benneth.

